

Calvin Maduro trahando duro den campo di training di Los Angeles Dodgers

ORANJESTAD- For di siman pasa Calvin Maduro ta na e campo di entrenamiento di e popular ekipo di Liga Nacional, Los Angeles Dodgers, tratando na gana un puesto riba e roster di e ekipo cu lo habri e temporada di baseball di Grandes Ligas.

Si Calvin logra impresioná gerencia di Dodgers e lo ricibi un contrato di un temporada mescos cu algun otro lanzadornan mas cu ta trahando pa un puesto riba e roster.

Un di nan ta e conocido Wilson Alvarez kende tabata tira pa entre otro Chicago White Sox pero desde cu el a haci un operacion na su braza di lanza, e no ta logra recupera su forma di antes.

Si Alvarez logra gana e puesto di regular e lo ricibi un contrato di \$750.000 pa un temporada y e lo ta un ganga pa Dodgers su staff di pitcheo.

E ventaha cu Calvin Maduro tin na e momentonan aki cu no tin mucho atencion pa su persona y por traha den tur tranquilidad pa gana un posicion pa keda riba e roster na inicio di temporada 2003.

Den fin di siman e ultimo lanzadornan a raporta na e campo di entrenamiento mientras cu tin varios otro regular manera outfielders y infieldernan kendenan tambe a cuminza raporta pa di e forma aki cuminza tempran cu nan preparacion pa e temporada nobo.

